

欽定剿平粵匪方略

欽定勦平粵匪方略卷三十五 癸丑年

四月十七日 辛卯 江甯布政使陳啟邁奏言 臣查

徐州地方爲北行要道在城兵勇不及千名現
有三路糧臺餉銀軍火均關緊要難保賊匪不
伺隙生心且距江浦僅六百五十里中間廬鳳
各處土匪難保不聞風又起皖省兵力極單徐
州唇齒相依不可不早爲豫備惟有仰懇

天恩飭下慧成李德於原調防剿官兵已到清江宿遷
及山東途次者迅速改道來徐二三千名並派
熟諳軍務武職大員帶領相機扼剿俾免疏虞
奏入

上命軍機大臣傳諭慧成曰陳啟邁奏徐州情形喫重
請調重兵扼剿現在大營糧餉軍火萃集徐州防護
必須兵力著慧成將現到各路官兵酌留徐州一帶

以資防堵前據奏請移糧臺於宿遷是否業經移設
總宜隨時察看情形妥慎辦理

上又命軍機大臣傳諭李德曰徐州近扼黃河又爲各
路糧臺總匯之地稍有疏虞關繫匪淺著李德於過
境官兵先其所急催令前進俾資防守一面知照慧
成將清江等處已到官兵迅速分撥應援毋稍遲延

十八日
壬辰琦善奏言臣據六合縣知縣溫紹原

稟稱賊匪竄至浦口以後初八日燒燬江浦縣之東葛驛卽抵滁州旋被攻陷安徽撫臣李嘉端現駐廬州府周天爵呂賢基均在宿州一帶諒可就近迎擊並有臣飭令帶領黑龍江原隊官兵之西凌阿等折回滁州一帶追剿如果前後夾攻該匪自腹背受敵查滁州路通四處由舒城桐城潛山太湖英山應山等縣可至河南

信陽州由舒城六安可至河南光山固始等縣
由滁州定遠鳳陽靈璧宿州可至河南永城縣
由滁州來安天長盱眙五河卽至淮安府之桃
源縣無須經過清江浦以上各路信陽光固較
遠永城次之惟桃源一路偏近黃河計程三站
卽與東境毗連路近則籌防宜速臣琦善現在
確探賊蹤是否踞守滁州或向何處分竄擬卽

督率原帶陝甘直隸督標官兵探明賊蹤所在
超越賊前迎頭截剿惟刻下揚州正在攻剿喫
緊之際臣與陳金綬勝保所帶官兵共祇數千
若遽分兵前往又恐該逆乘我兵單出巢抵敵
難期制勝惟有仰懇

天恩飭催慧成就近督帶官兵星夜來揚與陳金綬勝
保會同接辦攻剿事宜俾臣得以親督官兵星

速馳往查探迎剿

琦善又奏言臣查大股匪眾盤踞江甯鎮江揚州三城恃爲犄角臣與向榮分攻江甯揚州南北之軍皆在陸路聲勢旣難聯絡其水路艇船又遠在鎮江現江甯揚州擊敗之賊往來江中無所阻攔且浦口六合儀徵等處隨在皆可登岸賊若由江甯而至鎮江計程尙隔一百八十

餘里若到浦口六合等處則對江徑渡一水相通況鎮江續調上海艇船一經到齊攔截大江則逆蹤不能南竄勢必羣趨北岸東路淮徐距賊尙遠已蒙

簡派重臣分兵扼守獨與賊對渡之浦口六合儀徵防兵甚單且有馬隊無步隊不能收相輔而行之益爲今之計與其分兵遠防莫若合兵迎剿可

以迅掃妖氛刻下滁州失陷凡續調之兵路經
安徽不能不截留堵禦縱有多兵亦無由直到
江北設逆賊狡焉思逞浦口六合儀徵兵力單
薄深恐寡不敵衆惟有仰懇

天恩迅速添派北路綠營官兵兼程前赴浦口六合儀
徵使逆賊知我有備不敢萌北竄之心則他路
庶可調度

同日周天爵呂賢基奏言據鳳陽靈璧等縣及
宿州探報逆匪於初九日竄入滁州經署藩司
奎綬札委知府裕恭等前赴關山一帶防剿初
十日該匪已竄過關山至定遠所屬之池河驛
旋又北竄總鋪直撲鳳陽所屬之臨淮關將濠
梁驛號舍燒燬查臨淮關爲渡淮要路飛札該
署司等相機撤去浮橋將船隻藏於北岸各河

港內以遏奔軼惟沿淮南北兩岸處處可渡急
宜乘機堵禦擬將宿州現存兵勇由臣周天爵
統領在宿州城東要路酌量前進並號召宿州
團練鄉勇分路截殺仰懇

天恩飭催李德慧成等各將所帶大兵擇其行走在前
去皖較近者速令赴皖聽候調遣現在驛路梗
阻惟自揚州大營速發勁兵直取滁州以中斷

逆匪之勢使該匪前後不能相顧然後大兵渡
淮進援鳳陽斯逆黨可期蕩平均奏入

上命軍機大臣傳諭琦善陳金綬勝保曰琦善奏滁州
失守請帶兵迎剿覽奏彌深憤懣江甯揚州屢獲勝
仗該逆堅守不出現在陸路北竄之賊未必非其分
股以圖牽掣該大臣擬赴桃源永城一帶繞出賊前
迎頭截擊恐道路較迂兵機較緩且統帥遽離大營

則揚州聲威不壯又恐墮賊奸計慧成托明阿奕經等現已先後馳抵清江浦北路重兵計已陸續趕到朕思卽派托明阿統帶現到之兵疾趨皖省並飛催在途之兵迅速前進擇要迎勦計周天爵所帶義勇與續到陝甘官兵亦可彙齊夾擊其滁州以南係賊來路卽爲揚州大軍後路若我以勁兵由六合江浦直擣滁州衝斷賊勢使賊腹背受敵與北路迎擊之

兵前後夾攻當可得手該大臣前奏已派武慶開隆
阿等帶兵前往擊賊又有德崇額西凌阿等均扼江
北要隘應如何督催進剿可否於陳金綬勝保二人
中酌派一人前往統帶琦善係欽差大臣值此賊蹤
靡定惟當統籌全局相機迅爲布置萬勿令賊北竄
卽慧成所帶各兵該大臣亦可調遣此股賊匪究於
何路竄出滁州失守情形究竟若何有無土匪勾結

內應該州文武員弁如何下落著查明具奏該大臣
此次奏報何以陳金綬勝保並未列銜著一併具奏
上又命軍機大臣傳諭周天爵呂賢基李嘉端曰賊匪
大股盤踞金陵及鎮江揚州三城而以分股牽掣我
兵自應及早殲除周天爵呂賢基現將宿州兵勇並
西安先到之兵酌帶前進著卽督率將弁探明賊蹤
相機截擊皖省土匪尙未掃除淨盡斷不可令其勾

結致勦辦更難得手其分竄賊匪究係從何路竄出約有若干人是否占踞滁州其失事情形官員下落著周天爵呂賢基李嘉端等詳查具奏至文報糧餉道路尤關緊要如有阻隔務卽設法繞道行走不可有誤

上又命軍機大臣傳諭慧成托明阿曰賊匪占踞揚城堅拒不出而以他股竄擾滁州一帶牽掣大軍朕早

料其詭詐必有此舉琦善係統帥大員若此時遽離揚州正恐墮賊奸計慧成扼守清江並須兼顧下游著卽派托明阿將現到之兵無論何人所帶迅卽分撥帶往迎剿現在賊偏臨淮我兵自徐州而下必須迎頭截擊斷無株守淮北聽賊至而後縱擊之理若揚州派兵直趨淮南斷賊後路與北路之兵渡淮夾擊使賊腹背受敵攻剿更可得手軍情變幻靡常殊

難遙度慧成等所帶之兵原爲大營應援一切調度
機宜諒必隨時互商酌辦務使賊匪不得踰淮而北
而揚州大兵亦不爲奸謀掣動方爲妥善徐州爲渡
河要道又爲糧臺重地尤應全局統籌設法援守萬
不可稍有疏虞

上又命軍機大臣傳諭陸應穀曰本日據琦善奏滁州
失守又據周天爵呂賢基等奏逆匪北竄直撲臨淮

關各等語永城縣爲由皖入豫門戶提督善祿是否
已帶兵趕赴安徽陸應穀著卽出省迅往永城一帶
扼要駐紮嚴密防堵切勿令賊匪闖入其光山固始
信陽等州縣一體偵察勿稍大意前調赴山東之陝
甘兵四千名已據周天爵等奏准截留現在皖省防
剿萬分喫緊著該撫飛催後起過境之西安官兵星
速前進毋得稍有遲誤

二十日甲午文藝奏言臣駐紮丹徒鎮隨至丹陽

縣地方會齊官兵整齊器械以杜賊匪下竄之路三月二十九日提臣鄧紹良與臣督兵移於離鎮江十里之甘棠橋地方紮營三十日帶領旗綠兵勇二千餘名出隊進至南城外觀音山一帶逆匪四五千人蜂擁來撲提臣鄧紹良與臣督率旗綠兵勇迎前放礮轟擊奪獲黃旗三

桿擊斃賊匪二十餘名轟擊賊人不計其數乘
勝直逼城下該逆勢似退縮不料竟由運河旁
寶塔山分股斜衝旗營官兵奮勇向前猶復力
戰因勢薄卽令撤隊回營除受傷兵三十一名
外陣亡佐領賡善萬清廣慶防禦雙永圖敏泰
椿齡留貴善成驍騎校恆秀雲騎尉春祥委前
鋒校陞興陣亡兵八十一名現在移營京峴山

駐紮水陸併力進剿奏入

上諭曰此明係攻前遺後被賊兜衝一大敗仗何不詳細聲敘已有旨將汝發往新疆若奮勇向前奏報皆實不特前罪邀免尙可序功若有意掩飾則是一無用之人徒留無益惟有正法而已

同日琦善奏言臣據來安縣知縣稟稱探得初九日賊由烏衣一帶至滁州南門入城劫擄倉

庫搶掠典鋪復由西門出城竄至諸隆橋地方
等語查諸隆橋在滁州之西距州城三十五里
東北可至來安天長等縣西南可至廬州府西
則直達鳳陽府臨淮關等處路徑紛歧在在均
通北竄之路六合儀徵濱臨大江浦口更緊對
江甯其六合儀徵又在浦口下游而北岸瓜州
與南岸鎮江對峙所有艇船數本無多停泊焦

山是江甯以迄瓜州一百八十餘里之江面竟無堵截之船此時賊匪固來去自由卽將來鎮江克復艇船移泊瓜州江面仍無一巡截舟師該逆窮蹙思竄逆流而上其勢較難獨有對江卽渡浦口六合儀徵等處設不添兵嚴防未免重南輕北是以臣前有北路添兵之請臣於未派武慶開隆阿等帶兵馳赴浦口之先曾以北

路緊要似須陳金綬勝保二人中酌量一人前往商之陳金綬勝保據云該提督等係奉

旨責成攻勦揚州逆匪現在勢難兼顧是諸臣各有專

司臣不敢不先顧北路且疊據江浦六合儀徵來安天長等縣紛紛以軍情緊急各請援兵數千而臣所帶之兵除已分撥各隘外數祇三千其調防儀徵之參將張守仁所帶陝甘兵一千

七百餘名除已到三百餘名暫留浦口外其餘均在途未到惟有在湖南守城之川勇六百名尙屬得力飭令縣丞張繼武管帶由水路前來其大名官兵雖已應調來營而滁州以上地方戒嚴勢不能不聽其截留堵禦陳金綬勝保旣不能分身前往臣又不能置北路於不顧惟有俟接替有人卽當親自帶兵馳剿可否仰懇

天恩飭催慧成星速來揚會同陳金綬勝保接辦攻剿
事宜俾臣得分身帶兵馳往探蹤迎剿並添派
綠營官兵星馳前赴浦口六合儀徵一帶防堵
庶兵力厚集面面設防得遏該逆北竄之路奏
入

上命軍機大臣傳諭琦善曰朕思揚州賊匪圍困不出
而以他股由陸路牽掣我軍恐琦善遠離大營致墮

奸計是以特派托明阿就近帶兵與周天爵等迎截
北竄之賊復命琦善等督催西凌阿德崇額武慶等
帶兵斷賊後路又慮現在北路續調重兵統兵多係
一二品大員事權不一調遣難資得力本日已明降
諭旨令該大臣節制江北諸軍矣茲復據琦善奏請
飭慧成來揚接辦攻剿自請帶兵繞至北路迎擊似
與陳金綬勝保商酌意見未合又恐慧成等所帶之

兵不能調遣故爲此奏朕昨日見陳金綬勝保未經
聯銜已料及此現在賊情詭譎意圖牽掣該大臣等
協力同心尙恐不濟豈可稍存意見耶此旨著與陳
金綬勝保同閱此時北路萬分緊急無論何人迅卽
帶兵迎擊若能擊敗分股賊匪於江南江北大局可
冀成功儻稍有疏失貽誤匪細軍情緩急勢難遙度
惟望該大臣等善體朕意毋稍拘執也

上諭內閣曰揚州賊匪業經大兵圍困勢已窮蹙其分股竄擾滁州一帶復派北路重兵前往攻剿惟統兵多係一二品大員必須事權歸一以專責成琦善係欽差所有江北各路官兵著統歸節制悉聽調遣該大臣其通籌全局迅掃賊氛毋負委任

同日兩江總督怡良奏言臣於四月初八日行抵江蘇省城詢悉近日情形並途中疊接向榮

楊文定來文知逆匪自連次被勦後僅能堅守
營壘不復四出滋擾但賊情詭譎總宜加意防
守現又接據許乃釗來咨奏明截留閩兵一千
名防守蘇州省城前此閩省調來兵丁本祇一
千名俟陸續抵境卽可派撥臣思蘇州爲省垣
重地兵力尙形單薄且調度無人是以擬暫任
蘇省以安民心仍可策應常州等處奏入

上命軍機大臣傳諭向榮怡良許乃釗曰本日已明降諭旨將楊文定革任拏問交刑部擬罪矣怡良職任兩江責無旁貸現暫住蘇省須體察何處緊急卽往策應方爲妥善楊文定所帶礮船和春一人能否督率著向榮仍派結實可靠大員前往接替刻下賊由浦口六合竄至滁州明係分股牽掣急須江面礮船從中橫截使賊首尾不能相應方爲得手該大臣等

務當悉心籌畫隨時知會江北大營水陸夾攻毋任
北竄

上諭內閣曰前有旨令楊文定在江甯辦理防堵迨陸
建瀛自九江退回藉詞移往鎮江又不能嬰城固守
旋至失陷輒復退至江陰因一時簡用乏人將該員
革職暫行署理兩江總督猶冀其帶罪自效或可稍
贖前愆乃數月以來毫無布置實屬大負委任著卽

革職拏問交怡良派員解送刑部治罪

同日李嘉端奏言查賊破滁州後由池河紅心驛徑撲臨淮關經藩司奎綬將調赴揚州之山東兵八百名截留並委知府裕恭帶領兵勇堵禦並請多調兵勇迅往接應查鳳陽爲南北咽喉設有疏虞河南山東全局震動臣未敢在廬株守亟應督兵往剿廬州現有民勇四百九十

餘名酌選四百名交候補直隸州知州李登洲等作爲前隊又都司海陞管帶壽春兵二百九十餘名臣親帶前往救援飛咨河南山東江蘇各巡撫及徐州鎮總兵四面兜剿以期一鼓成擒奏入

上命軍機大臣傳諭周天爵呂賢基李嘉端曰據李嘉端奏稱鳳陽爲南北咽喉情形最要酌帶兵勇親赴

救援並飛咨河南山東江蘇各撫及徐州鎮等四面
兜剿現在事勢亟迫各路官兵相距遙遠徵調恐難
濟急惟慧成托明阿之兵較近想已遵旨分撥前往
著周天爵呂賢基李嘉端會同速籌剿辦其陝甘兵
四千名前已行入皖境卽著飛催趕緊到齊以資調
遣此時徵兵籌餉均屬要務遠兵遠餉殊難救急惟
當就近籌酌移緩就急毋致稍有延誤

同日李德奏言東省門戶必須首扼淮徐所恃者惟黃河天險前將密雲山西陝甘等處官兵八千名分布於王家營各處實力防守原爲援應清江浦而設該處係南北鎖鑰所關甚重昨准琦善咨會前赴安慶已飭遊擊馮化青帶領一千四百餘名回東查此項官兵軍裝器械一切齊備可以就近截留調撥王家營先令該遊

擊暫行管帶約計山西陝甘官兵次第可到 臣
定於四月二十日起程前赴宿遷於山湖兩路
要隘安頓大營後卽周歷重興集王家營各處
按現在官兵實數約計尙有六千餘名分撥足
敷防堵容俟會商河 臣楊以增相度機宜加意
防範奏入

上命軍機大臣傳諭李德曰據奏擬親自帶兵前赴宿

遷於山湖兩路擇要防堵所奏尙合機宜著卽權衡
緩急相機妥辦如前路緊急自宜派兵進攻而後路
空虛亦宜準備不可稍涉大意致誤事機

同日

上諭內閣曰恩華現在統帶吉林官兵前赴江北軍營
所有續調黑龍江官兵到軍營後著一併交恩華統
帶

二十一日乙未向榮許乃釗奏言據總兵和春稟

稱四月初二日該總兵將艇船揚帆直上行至
焦山口遙見甘露寺至鎮城一帶皆有礮臺臺
下停泊大小賊船約三百餘隻見我師艇上駛
開礮迎拒各水勇亦開礮還擊當時擊壞賊船
數十隻燒燬六七隻陸路之賊隨卽退回鎮城
各艇又駛向江北直趨瓜州岸上逆匪開放大

礮連環不絕各師艇順風衝擊該逆船隻有被
艇船撞壞者有被大礮擊破者該逆不能抵敵
敗回江岸登岸之賊亦被船礮擊斃甚多日暮
風微始將各船退回除燒燬擊壞各賊船外生
擒賊匪三名殺斃無算此下游艇船勝仗情形
也臣等探聞大兵破雨花臺後賊中設備南門
尤嚴通濟朝陽兩門較疏初六日密派四川兵

勇攻通濟門之左陝甘兵勇攻通濟門之右湖南兵勇由鍾山攻朝陽門之右廣東兵勇由鍾山攻朝陽門之左貴州廣西雲南兵勇由鍾山直攻朝陽門之中於初七日五更出隊該逆卽於通濟朝陽二門內各出二三千人離城數十步而止我五路兵勇分投衝殺直撲賊陣該逆回奔入營我兵追擊殲斃極多於通濟門外刺

死執大黃旗賊目一名兩城外生擒賊匪共七十餘名隨卽偏近賊營開放槍礮奮力環攻直薄城闔城上矢石交下城外賊營大礮夾擊官兵暫退數武謾罵誘敵該逆始終不出臣向榮徧觀鍾山形勢舊時賊壘離城過近大礮能及我兵不便安營惟右手紫金山麓坡陀之上居高臨下俯瞰全城其地可以紮營四座因於十

一日飭役築壘護以兵勇該逆恐我軍占據形
勝出賊數千前來攻奪當卽揮兵分投尾抄該
逆遁回追殺長髮賊四十餘人餘皆逃匿入營
我兵亦卽撤回此江甯節次攻勦情形也至長
江上游據盧應翔等稟稱初十日會同都司楊
煥章等選派兵勇分作三路一由雙牯小河水
路進一由大江水路進一由雙牯洲陸路進另

派奮勇二百五十名各持火器假賊旗幟號衣
用小艇沿江北岸潛渡南岸草窠峽伏蘆洲中
十一日子初出隊約定丑刻齊抵信地起火爲
號同時舉發盧應翔督帶礮船八隻礮勇四百
名從雙牖河直抵螺絲橋繞出夾江楊煥章帶
官兵三百五十名沿洲繞岸至夾江於蘆葦中
多樹旗幟以爲應援千總黃秉忠督帶礮船十

二隻小礮船二十四隻礮勇五百名從大江繞進夾江賊營放礮迎拒楊煥章卽從葦岸接應夾攻將賊營並礮臺望樓一齊踢毀殺賊十餘名奔潰落水死者無數乘機齊進見城外賊船林立上有礮臺對我船開礮盧應翔礮船抄截賊船之後黃秉忠率領各礮船迴環衝突施放大礮轟碎賊船二十餘隻並用火桶火罐燒燬

賊船一百餘隻賊船始皆潰散其川楚各勇從
草輾峽分作數路同時拋擲火器各燒賊船洲
上賊匪見各船火起約數百人擁出馳救陳喜
率船中礮勇登岸赴援立斃執黃旗賊目一名
賊始紛紛潰逃各兵將峽口木簾卽時拆斷救
出民船一百三十餘隻此上游礮船勝仗大略
情形也查該逆盤踞金陵於城門外挖濠築壘

排列大礮爲負固計今我兵已紮營紫金山可
以用礮對擊並已行文蘇杭各處調出四五千
斤大礮以便安放新營對擊朝陽門外賊營惟
是現在兵力戰勝有餘而省城過大圍攻不足
非潛通消息運奇設謀一時難以力爭必須見
有成效乃可深入奏入

上命軍機大臣傳諭向榮怡良許乃釗曰該逆分踞金

陵鎮江爲負固計和春與各鎮將督率戰船進攻下
游擊壞匪船向榮探聞通濟朝陽兩門賊防甚疏分
別五路進擊並奪紫金山築壘安營其長江上游亦
經盧應翔等分路進攻焚燒賊船連次獲勝卽著該
大臣設計用間謀定後戰早圖克復朕心實深盼望
現在南北兩岸賊船甚多總須斷其浮橋使不得來
往自如以孤其勢則浦口等處北竄之賊亦不敢深

同日李嘉端奏言臣於初九日接據探稱浦口有賊船千餘隻停泊江心北竄要道必須重兵防守臣卽咨周天爵督飭原帶將弁管領留鎮定遠之山東等兵趕赴清流關扼要置守又調舒城縣收集之壽春兵二百六十餘名前來廬郡由臣調遣又安省之宿亳係渡黃要道現值

逆匪分股竄擾滁州漸近宿亳較爲喫緊臣已
分咨河南撫臣飭令將原派之弁兵進駐亳州
山東撫臣將駐紮交界之兵進駐宿州以防北
竄雖該逆大夥尙在江甯而此股業經北竄所
關尤巨况揚州餘賊無多未便顧彼失此臣已
飛咨琦善分兵由天長抄出賊前迎擊並咨向
榮分兵應援冀免竄逸惟安危所繫間不容髮

誠恐該大臣等稍有遲滯必致貽誤事機應請
特旨分飭該大臣等迅速調撥精兵前來堵剿遏賊北
竄要路

李嘉端又奏言探聞浦口斗岡營盤火藥被賊
燒燬山東黑龍江官兵退回滁州南關初九日
賊至滁州用礮轟開城門擁入山東黑龍江兵
連夜由池河退回紅心驛等情查紅心驛距臨

淮僅六十里滁州北惟清流關可守過此惟淮河最爲扼要現臣周天爵行抵宿州卽趕回堵截恐賊已過清流不及防禦僅能於河上下紮營鳳陽以南均無重兵各城練勇亦單一無足恃爲此籲請

皇上飭下江西湖北各督撫就近挑選精兵數千名趕赴廬州以資救應奏入

上命軍機大臣傳諭李嘉端曰前聞賊擾滁州當經諭令琦善酌派精兵馳往救援又命托明阿就近帶兵徑赴北路與周天爵等合力迎剿各路官兵早經分撥必可迅抵皖省且截留陝甘官兵計亦陸續趕到該撫卽與周天爵呂賢基等妥爲布置勿令賊匪紛竄仍飛催未到各兵以資調遣當此賊蹤靡定惟當就近籌撥以期有濟毋庸遠調鄰省官兵徒延時日

也

上又命軍機大臣傳諭琦善曰前因賊匪攻陷滁州疊
經諭令琦善分兵應援本日復據李嘉端奏請調江
西湖北官兵前往朕思琦善所派援兵暨托明阿周
天爵所帶兵勇計日可到毋庸遠調他省官兵徒稽
時日該大臣所派援兵著令迅速馳往毋稍遲延至
黑龍江官兵前在浦口遇賊退回營盤被燬賊至滁

州用礮轟開城門山東黑龍江兵連夜由池河退回
紅心驛黑龍江兵素稱勁旅何至遇賊披靡毫無振
作該帶兵官所司何事著琦善迅卽查明據實具奏

二十二日丙申楊以增奏言臣准向榮咨稱賊由

江浦越竄滁州派兵堵截等因查滁州北距徐
州六百餘里係屬驛路東北距清江浦三百餘
里係屬間道關係尤重前飭遊擊蔡天祿等就

地募勇並派洪湖河右營兵前往設防尙嫌力
單派委千總劉冠文等管帶練勇三百名馳赴
蔣壩紮營時赴來安天長等處分投巡哨並因
一綫湖隄袤延百數十里無險可扼現於蔣壩
迤南添築土堰以備屯兵守禦此陸路情形也
又查滁鳳東北爲臨淮關再下卽淮河口乃入
洪湖要路查湖內山岡叢錯周圍四百餘里一

帆可達是水路較陸路尤爲緊要隨飭山東後
起參將嵩瑞率領所帶官兵馳赴盱眙上游擇
淮河要隘處所相地紮營以資堵截並飛札沿
湖州縣將湖船悉數調泊北岸委員嚴查以防
偷越此水路情形也惟賊竄滁鳳一帶現經琦
善派兵追剿並有周天爵等遏其前路難免不
豕突狼奔所有盱眙水陸兩路俟續有兵到尙

須添撥方昭慎重

同日李嘉端奏言據連日探報皆稱逆賊盤踞
臨淮其意叵測鳳陽府城雖未失守而土匪槍
劫勢已燎原爲今之計山東兵由宿靈進分出
懷遠定遠河南兵由潁亳進分出壽州六安淮
揚兵分出盱眙泗州滁州全椒庶幾四面兜剿
可冀殄滅若一路空弱賊必趨之東西皆有北

竄之路均宜極力堵禦刻下李德陸應穀周天
爵呂賢基在北琦善陳金綬勝保在東其南則
向榮一軍餘力尙可截其後惟西路則鎮臣遠
在潁州牽於土匪臣在西南水陸皆關緊要現
在兵勇數不滿千而鳳定紛紛告急當令將弁
帶勇三百名先行繼令王正誼於梁園鎮會合
李鴻章號召練勇勸借軍餉臣卽於十八日帶

領壽春兵二百七十四名陸續進發明知此舉
無益頗近行險徼倖之爲然非臣策其後而驅
之終恐未能踴躍且於號召勸借等事亦恐呼
應不靈故不辭輕易之譏冀稍竭涓埃之報均
奏入

上命軍機大臣傳諭周天爵呂賢基楊以增李嘉端曰
現在逆匪盤踞臨淮鳳陽勢甚危急亟宜四面兜剿

遏其北竄李嘉端於十八日帶兵赴援自係刻不容
緩惟所帶兵壯單薄卽號召練勇亦屬緩不濟急該
撫旣冒險前進儻各路竟無接應致令賊勢益張所
關匪細著周天爵呂賢基迅卽帶領兵勇星速赴援
與托明阿善祿及李嘉端或合兵進攻或分路撓截
兵貴神速萬不可稍事拘執致有延誤至清江西路
亦宜嚴防楊以增所奏水陸防堵情形自爲遏賊分

竄起見惟退守不如進攻楊以增仍當偵探賊情隨時相機進剿以爲我軍後路聲援聞李德現已帶兵前抵宿遷正可聲勢聯絡互相策應該侍郎等總以權衡緩急先幾應變力堵賊匪北竄勾結是爲至要上又命軍機大臣傳諭慧成托明阿曰本日據李嘉端奏親督兵勇前進其所帶官兵不過二三百名即使號召練勇亦非剋期能集設有疏失關係甚重江北

帶兵諸臣次第前進無論水陸要隘均應隨時相機
勦辦若稍涉拘泥卽恐有誤事機慧成現赴揚州卽
著托明阿遵照前旨將北路現到之兵無論何人所
帶迅卽統帶何處賊情緊急卽馳往該處攻擊萬不
可徒有分兵之名仍無勦賊之效該署督等諒能權
衡緩急相機迅辦也

同日陸應穀奏言據呂賢基周天爵等咨會十

一日賊至臨淮關現在鳳陽危急等情臣查皖豫相爲唇齒賊旣竄至鳳陽自當不分畛域派兵協防惟豫省歸德陳州光州皆與皖省接壤又時有捻匪出沒防守均屬緊要現駐紮永城官兵三千三百餘名除前經慧成調取一千五百名帶赴江北外現在連截留商州興安之兵僅存二千二百餘名尙屬不敷布置擬將截留

永城之商州興安官兵五百名並善祿原帶之
陝西兵七百五十名調赴李德軍營道出豫省
之宜君營參將兵六百五十名共兵一千九百
名先交善祿管帶馳赴宿州協防其已到歸德
之兵尙有定邊營副將所帶兵七百名甯夏營
都司所帶兵五百名刻下驛路梗塞不能前進
應請先行截留駐紮歸德以資守禦奏入

上命軍機大臣傳諭陸應穀曰現在賊撲臨淮關鳳陽
危急巡撫李嘉端前往督勦兵力甚單實深懸繫著
該撫卽令善祿帶兵迅速赴皖不可稍有遲誤至永
城爲由皖入豫緊要門戶留兵嚴守亦係要著該撫
諒已遵旨馳抵永城仍著先其所急將現留之定邊
甯夏官兵飭令迅速前進以爲善祿後路應援陝甘
官兵前已准令安徽盡數截留其未到之二千餘名

著卽催令速進該官兵行抵歸德仍著該撫隨時察看情形斟酌留遣並咨會周天爵李嘉端等查照總期移緩就急共保大局